

EKISORO

Yatsipereavageigakera iseraereegi Ejipitoku

1 ¹Maikari^a maika ontsirinkakota-kempa ivairopage iseraereegi aiganki-tsirira Ejipitoku itentaiganakarira Jakovo. Paniropage yamaiganakeri itomiegi: ²Iroven, Sumeon, Irevi, Jora, ³Isakare, Savoron, Vejamin, ⁴Iran, Nepetari, Gare intiri Asere. ⁵Maganiro itomiegi Jakovo intiegiri ivisariegite onti inaigake 70. Yogari Jose ontitari inake Ejipitoku.

⁶Impogini ikamaigake Jose intiegiri irirentiegi intiegiri aikiro maganiro itentagaigarira, ⁷kantankicha yogaegiri iyashikiiganakerira Iseraere itomintaiganaka itovaigavageiganaketyo kara yapagiteavageiganakarotyo Gosen. ⁸Impogini itimake pashini koveenkari Ejipitoku terira inkemakoteri Jose nerotyo tera intsarogakagaigempari iyashikiiganakerira ikantantaigakaririra itovaireegi ikanti:

⁹—Yogaegi iseraereegi pairi yavisai-gake itovaigaigakera yavisaiagakai aroegi.

¹⁰Maikari maika tsame aneaigakera tyara ankantaigakeri ganiri atanatsi itovaigira. Antari garika tyara akantaigiri onti ariompa intovaigasanoiganakeri impo iripokashiigakaerika pashini iromanataiga-kaera irimaiganakempa iriroegi intentai-gakemparira iromanataigakaera impo iragaveaigakaera irishigaiganae parikoti.

¹¹Ovashi itigankimoigakeri kisavintsai-gakeririra yantavagetaigakerira yovetsikakagaigakerira pankotsipage ontaikantaganirira iturigokite paraon. Ogari apatotakara pankotsipage yovetsi-kakagaigakeririra onti opaitaka Piton. Ogari apitene onti opaita Irameseshi.

¹²Kantankicha ariompatyo ikisavintsai-gakerira ariompatyo itovaigasanoiganakeri ovashi ipinkaiganakeri. ¹³⁻¹⁴Impo iriroegi ariompatyo ikisavintsavageiganakeriri yatsipereakagaigakerira yomperaperaiga-karira yantavagetaigakerira. Yovetsi-kakagaigakeri kipatsikoti ontiri onkuso-tantakemparira ovetsikakenkanira pankotsi, aikiro itsamaitagaigakerira teratyo irapishigopireimaigempa.

¹⁵Impogini yogari paraon irorokya iniaigake tsinaneegi evereoegei neaigiro-rira otovaireegi omechotakoigira. Irorori onti opaita Supera, ogari apitene onti opaitaka Poa. Impo irirori ikantaigiro:

¹⁶—Antari pimpampogiaigerora pitovaireegi omechotakoigera pineaigakerika inti surari pogamagaigakeri, antari ontirika tsinane ario gara pogamagaigiro.

¹⁷Kantankicha iroroegi opinkaigakeri-tyo Tasorintsi ovashi tera ontsatagai-gero ikantaigakerorira. Oneaigavetaka imechoigakera surariegi agaigakerityo.

²²Impogini yogari paraon irorokya ikantaigake maganiro Ejipitokunirira ikanti:

a 1.1 Ekisoro *Exodo* onti onkantakera “iaiganaira parikoti”. Oka sankevanti onti oniakoigakeri iseraereegi iponiaigaara Ejipitoku iaiganaira parikoti, irorotari opaitantakarira Ekisoro.

—Antari omechotakoigera iseraereegi irirorika surari povuokajaigakeri. Antari ontirika tsinane arione, gara povuoka-jaigiro.

Imechotakera Moiseshi

2¹Impogini itimake paniro iyashikitanakerira Irevi yagake tsinane, ario okañotaka irorori onti iyashikitanakerira Irevi. ²Impogini itimake otyomiani omechotakeri inti otomi inkamativageteratyo kara, ovashi omanakeri mavani kashiri. ³Impo oneavakera tenige agaveae omanaerira agake totora ovetsikashitakeri tsiveta avitsaakero, impo oyagakeri ogimaatakotakeri omanakotakeri totorashiku. ⁴Otigankakero iritsiro opitakera parikoti oneventakotakarira. ⁵Impo ogari irishinto paraon agateatake oaaku onkaatera otentaigakaro onampiriaegi. Iroro oshiteigavetanakara oneiro tsiveta maavagetake totorashiku ovashi otigankakero paniro onampiria aguterora. ⁶Impo amakerora otatareavetaro oneiri inti ananeki kaemavatake. Otsarogakaganakari okanti:

—Onti tomintari everea.

⁷Ogari iritsiro okantiro:

—Atsi nonkantakite paniro everea onampitakempirira ontsotagakempirira.

⁸Irorori okantiro:

—Nani.

Ovashi oatake okantakitirora iriniro.

⁹Impo opokakera okantiro:

—Pamanakerira yoka ananeki ponampitakenarira impo nompunataempi.

Irorori aganakeri amanakerira ovankoku ogimonkakera. ¹⁰Antari imaranetanakera amanainiro opegakerira otomi opaitakeri Moiseshi, okantaketari: “Ontitari nagairi oaaku.”

Ishiganakara Moiseshi

¹¹Impogini yantaritanakera Moiseshi iatake ikamosoigakerira itovaireegi, impo

ineagakeri yatsipereavageigakera yantavageigakera. Ario kara ineake paniro Ejipitokunirira ikisakisatakerira paniro evereo ipasapasatakerira. Itsarogakaganakarityo kara, intitari itovaire.

¹²Impo ishonkagetaka parikoti inei mamerigitevagetake tyanimpa neakerine yogutarityo Ejipitokunirira ikitatanakeri impanekiku. ¹³Impo okutagitetanakera iatai aikiro inkamosoigaaterira itovaireegi, ario ineake pashini piteni ikisavakagaigakara ipasapasatakerira irapitene. Piteniro inti evereo. Irorori ikantiri yoga pasapasatakeririra irapitene: —¿Antari gara pipasapasatiri?, intitari pitovaire.

¹⁴Iniamatanaketyo irorori ikantutarityo:

—¿Matsi tyanimpatyora kantakempi pimpegakempara notinkamiegi? ¿Tyanimpatyora pegakagakempi nojoeseegegi? ¿Ario pikogake pogakenara naro aikiro pinkañotagakenarira pogakerira Ejipitokunirira?

Ovashi itsarogavagetanake Moiseshi ikanti: “Arioratyo ogotunkaniratyo nogantakera.”

¹⁵Impo ikemakotakerira paraon ikogaketyo irogakagantakerimera, kantankicha irorori ishigapitsatanakari iavagetake Marianku, ario itimake kara.

Impo yagake tsinane kara Marianku itomintaka piteni. Paniro onti ipaitakeri Jereson, yogari irapitene ipaitakeri Eriesere.

²³Impogini otovagagitevagetanakera ikamake paraon. Yogari iseraereegi yatsipereavageigaketyo kara iragaigaka ikaemavavageigaketyo kara impo yogari Tasorintsi ikemaigakeri ²⁴ovashi isureta-naaro ikantakeririra Averan intiri Isaako intiri aikiro Jakovo, ikantakeritari inkavintsaavageigakerira iyashikiigana-kerira.

**Tasorintsi ikantakerira Moiseshi
intigankakerira paraonku**

3 ¹Impogini yogari Moiseshi isentakeri irovishate Jetero yagashintotirira. Irirori inti isaseroroteegine Mariankunirira. Impo yamaiganakeri ovisha ikenakagaiganakeri osarigagitetaakera yongonkevagetaka otishiku paitacharira Oreve ikoneatimotakerira Tasorintsi impogini. ²Antari inakera kara isentakera ovisha ikoneatimotakeri isaankariite Tasorintsi tankoku ineiro omorekanake aratsantsaenkagematanake. Yoganakero kavako ineiro opoamavetanaka, kantan-kicha tera ontagempa ³ovashi ikantake: “Noateta nonkamosotakiterora tyara okantakara tera ontagempa.”

⁴Yogari Tasorintsi inavakerira yaiñonitanakara inkamosotakerora inianake tankoku ikantiri:

—iMoiseshi, Moiseshi!

Ikanti irirori:

—¿Tatoita?

⁵Ikantiri:

—Gara paiñonita. Sapatoreempa, aiñonatari naro aka.

⁶Impo ikantiri aikiro:

—Nanti Tasorintsisanorira ikematsaigirira yashikiiganakempirira, narotari ikematsati Averan, Isaako intiri Jakovo.

Yogari Moiseshi oga ikenake ipashitana ivoroku, ipinkanakeritari Tasorintsi. ⁷Impo irirori ikantiri:

—Maika noneasanoigakeri yatsipereavageigakera nashintaigarira naigankitsirira Ejipitoku nokemaigakeri ikaemavavageigakera ineagakera yatsipereakagavageigunkanira. Maika notsarogakagaiganakari. ⁸Irorotari nopokashitake nompugamentaigakerira irapakuigaerira Ejipitokunirira namaiganaerira parikoti okametigitetira omaranerikatyo kipatsi kara. Ariotari kara itimaigiri kananeoegi, jeteoegi, amoreoegi, pereseoegi, jeveoegi

intiri jevoseoegi. ⁹Nokemaigakeritari ikaemavavageigakera, aikiro noneaigakeri yatsipereakagavageigakarira Ejipitokunirira. ¹⁰Maikari maika viro nontigankake paraonku pinkantakerira irapakuigaerira, narotari shintaigari.

¹¹Yogari Moiseshi ikantiri:

—¿Matsi tyanimpatyora naro kameti noatakera paraonku nonkantakerira irapakuigaerira?

¹²Kantankicha irirori ikantiri:

—Piatetyo, nontentakempitari.

Maikari maika kameti pogotakeniri naro tigankakempi nonkantakempi: Antari pamaiganaerira parikoti pimpokaigake aka otishiku pishineventasanoiganakenara pintsatagageiganakerora nonkantakempirira.

¹³Impo ikanti Moiseshi:

—Antari noatakakeri nonkantaigapaa-kerira iseraereegi: ‘Inti tigankakena Tasorintsi ikematsaigirira yashikiiganakempirira’, impo iriroegi inkantaigakenarika: ‘¿Tyara ipaita yoga Tasorintsi?’, ¿tyara nonkantaigeri?

¹⁴Ikanti Tasorintsi:

— NANTITARI NANTI. Onti pinkantaigakeri: ‘Intitari tigankakena NANTI.’

¹⁵Aikiro ikantiri:

—Pinkantaigakerira aikiro pinkante: ‘Inti tigankakena Tasorintsi, Itinkami yashikiigakempirira, irirotari ikematsaigirira Averan, Isaako intiri Jakovo.’ Ariotari nopaitari kantanakaniroro. ¹⁶Maika piate pampatoigakerira itinkamiegi iseraereegi pinkantaigakerira: ‘Yogari Tasorintsi, Itinkami yashikiiganakempirira, ikematsaigirira Averan, Isaako intiri Jakovo ikoneatimotakena ikantakena: Maika noneaigakeri nashintaigarira naigankitsirira Ejipitoku noneasanoigakeri yatsipereakagavageigunkanira ¹⁷ovashi nokantake: Namaiganaerityo parikoti ganiri yatsipereavageigai Ejipitoku onti nontentaiganakeri

okametigitetira itimaigira kananeoegi, jeteoegi, amoreoegi, pereseoegi, jeveoegi intiri jevoseoegi.¹⁸ Impo iriroegi inkematsaigakempi ovashi pintentaiganakempari piaigakera paraonku pinkantaigakerira: ‘Yogari Tasorintsi, Notinkami naroegi evereoegi, ikoneatimoigakena, irorotari maika nokogantagakarira noaigakera osarigagitetapaakera nontagaigakenerira piratsi. Nomagaiganake avotsiku mavati kutagiteri.’

¹⁹“Kantankicha naro nogotake garatyoyapakuaigimpi kogapage garika naro kisashitari kameti irapakuaigaempira,²⁰ nonkisashitakemparitari novetsikagematetyo terira oneimagentenkani nantsipereakagaigakerira maganirio Ejipitokunirira ompote irapakuaigaempira.²¹ Antari piaiganaera gara piaigi kogapage, ontityo impaarantaigavakempi Ejipitokunirira, narotari kañotagagetakerone maika.²² Paniropage tsinane onevigetanakero tsinaneegi Ejipitokunirira ompaigavakerora nenketsikipage ovetsikantunkanirira perata intiri kori. Aikiro onevigetanakero kamisapage pairorira okametitasanogetake iroroniri irogaguigakempa pitomegi ontiri pishintoegi. Onti onevigetanake choenitakoigakarorira ontiri itsinanetsiegite tsipereakagaigakempirira. Pinkañoi-gakera maika pamapitsaiganakerira Ejipitokunirira iarakipage.”

4¹ Impo inianake Moiseshi ikanti: —Garatyo ikematsaigana, ontityo inkantaigake: ‘Teratyoy arisano inkoneatimotempi Tasorintsi.’

² Ikantiri irirori:

—¿Tatoita pairikake?

Ikantiri:

—Onti nogotikiro.^b

³ Ikantiri:

—Atsi vuokero savi.

Inoshiki yovuokiro oga okenake opeganaka maranke ipinkanakeri ishiganaka.

⁴ Yogari Tasorintsi ikantiri:

—Atsi noshikeri irishiku.

Iroto inoshikakerira irishiku ogatyokenake opeganaa igotikiro yapagotairo.

⁵ Impo ikantiri:

—Maikari maika ineaigakerorika pinkañotakerora maika inkematsaigakempi arisano nokoneatimotakempi, narotari Tasorintsisanorira ikematsaigirira yashikiiganakempirira, narotari ikematsati Averan, Isaako intiri Jakovo.

¹⁰ Impo ikantiri Moiseshi:

—Garorokari ikematsaigana, teranikanogotumate noniera nonkenkitsavagetera kantakani nokañotara pairani kigonkero maika piniakenara. Teratyononiagantsitumate.

¹¹ Ikantiri:

—¿Matsi tyanityora timakagakerira ivagante matsigenka? Aikiro ¿tyanityora vetsikakerira terira irinie intiri terira inkeme intiri aikiro neatsirira intiri terira inee? ¿Matsi tera naro vetsikaigerine? ¹² Irorotari maika nonkantakempi piatakera, nontentakempitari. Naroniakagakempine nogotagavakempi tatarika pinkantake.

¹³ Kantankicha irirori ikantiri:

—Ejee garorokari noati. Atsi tiganke pashini gaveankitsinerira.

¹⁴ Ikisutarityo Tasorintsi ikantiri:

—¿Matsi tera noneeri pirenti Aaron iyashikitanakerira Irevi iniagantsitasa-noti? Maikari maika iripokake inkogakempira impo ineaempira irishinevetakempaty kara. ¹⁵ Virori pinkamantagetakeri magatiro iriniakerira, narokya mutakoigakempine

b 4.2 Nogotikiro: yogari jorioegi pairaninirira yogameiga yamaigira igotikiro tyarika iaigake, irorotari yaventaiga.

piteniro piniagantsiigakera, aikiro nogotagaigakempi tyarika pinkantaigakempa. ¹⁶Tatarika pinkogake pinkantagakerira pitovaireegi iriro niankitsine. Viro kamantavakerine kañomataka nantinirikaty niankitsi. ¹⁷Ogari oga pigotikiiro kankani pampagotakerora, irorotari povetsikantagetakempa posantepage terira oneimagetenkani.

Ipiganaara Moiseshi Ejipitoku

²⁷Impogini yogari Tasorintsi iniakeri Aaron ikantiri:

—Piate pintonkivoavakemparira Moiseshi osarigagitetapaakera.

Impo irirori iatake inepaakeri otishiku ikoneatimotakerira Tasorintsi yasaraanatapaakari. ²⁸Yogari Moiseshi ikamantagetakeri magatiro ikantakeririra Tasorintsi, aikiro ikamantagetakeri magatiro tyarika inkantaigakero irovetsikaigakera terira oneimagetenkani.

²⁹Impo iaigake Moiseshi itentanakarira Aaron yapatoitaigapaakeri maganiro itinkamiegi iseraereegi. ³⁰Yogari Aaron iniaigakeri ikamantageigakerira magatiro ikantakeririra Tasorintsi Moiseshi, aikiro yovetsikaigakero terira oneimagetenkani ineakagaigakerira maganiro iseraereegi ³¹ovashi ikematsaigakeri. Antari ikemaigakera ineaigakerira Tasorintsi yatsipereakagavageigunkanira ikanagavantaiganakari, ineaigaketari pairo itsarogakagantavageta.

Moiseshi intiri Aaron iaigakera paraonku

5 ¹Impogini yogari Moiseshi intiri Aaron iaigake paraonku ikantaigakerira:

—Yogari Tasorintsi, Notinkami naroegi iseraereegi, ikantake: ‘Pampakuaigakerira nashintaigarira iriaigakera osarigagitetapaakera irovetsikaigakera iviesetaegite isuretasanoigakenara.’

²Ikanti paraon:

—¿Matsi tyanimpatyora Tasorintsi kameti nonkematsatakerira nampakuaigakempira viroegi iseraereegi? Teranika noneimateri, garatyto napakuaigimpi.

Ovashi ariompatyo yovashigakova-geiganakariri maganiro iseraereegi yatsipereakagasanoiganakarira.

Impogini yogari Tasorintsi yagavea-kagaigakeri Moiseshi intiri Aaron yovetsikaigakera posantepage terira oneimagetenkani kameti irapakuaigaerini. Oketyo yogiivatake igotikiiro ipagakagakarora maranke impo akirotyo opeganaa igotikiiro. Impo ariokya iaigake oaaku ipasaantakara Aaron igotikiiro oga okenake opeganaka iraatsi ikamaviovetanake maganiro timaatantakarorira ovashi oshitiatanake tatampa oviikaenkani.

Impo ariokya iaigake oaakupage ontiri niatenipageku yogikonteigakerora masero otovaigavagetityo kara apagiteavaganakarotyog Ejipito. Impo yogari Aaron irorokya ipasatantakaro igotikiiro kipatsipane oga okenake opeganaka tsgito yagintaiganakari maganiro Ejipitokunirira intiri aikiro ipirapage. Impo yogari Tasorintsi itigankimoigakeri shikiri yoveraavageiganakerityo kara.

8 ³²Kantankicha yogari paraon ineavetakaty okañotakara maika ariompatyo yairikaiganakeriri iseraereegi teratyo inkoge irapakuaigerira.

9 ¹Impogini yogari Tasorintsi ikantiri Moiseshi:

—Piataatera paraonku pinkantakerira: ‘Yogari Tasorintsi, Notinkami naroegi evereoegi, ikanti: Pampakuaigakerira nashintaigarira iriaigakera intagaigakenara piratsi. ²Antari garika papakuaigiri ³yogari Tasorintsi irogamagetakeri maganiro pipiraegi nagetankitsirira sotsi shimpenashiku imantsigavageiganakera inkamavio-

ganake pigavayote, piashinote, pigame-yote, pivakane, povishate, maganiro.

⁴Kantankicha maganiro ipirapageegi iseraereegi garatyo ikamumati paniro.'

⁵Impogini ikantake Tasorintsi:

—Onkutagitetanakera ario nogamaga-getakeri.

⁶Impo ario ikañotakero. Okutagitetanakera ikamaviotaketyo maganiro ipiraegi Ejipitokunirira, kantankicha yogari irashiegi iseraereegi teratyo inkamumate paniro. ⁷Impo yogari paraon ikamosotagantakeri ipiraegi iseraereegi teratyo inkamumate paniro, kantankicha irirori ariompatyoshoishintsitanakeri teratyo inkoge irapakuaigerira.

⁸Impo yogari Tasorintsi ikantiri Moisesi intiri Aaron:

—Pavivaigakera samampopane oronokutirira impo viro Moisesi povuokavatakero enoku ineakempira paraon. ⁹Oga onkenake ompeganakempa kipatsipane ontsotenkagiteanakemparo Ejipito oga inkenaigake isompoiganake maganiro Ejipitokunirira. Isompoiganake aikiro maganiro ipiraegi.

¹⁰Impo ario okañotaka, kantankicha yogari paraon ariompatyoshoishintsitanakeri tera inkoge irapakuaigerira intsatagakerora ikantakeririra Tasorintsi Moisesi, irirotari kañotagakeri Tasorintsi maika.

²³...Impogini yogari Tasorintsi yogivarigakero inkoariki omarapagetyo kara okonogakaro kareti osaatsantsagagematityo kara okantagematityo pugarara pugarara ²⁵ikamavioigaketyo maganiro piratsipage nagetankitsirira sotsi shimpinashiku intiri aikiro matsigenkaegi. Magatiroosanotyoshoivosashinkeatakero pankirintsi page ontiri magatiro inchatopage.

Impo irirokya itigankake Tasorintsi pankerori yapagiteavagetanakarotyokara yogaiganakarora magatiro

pankirintsi page aityokyarira onagevetaa ogamagagetakerora inkoariki.

10 ²¹Impogini yogari Tasorintsi ikantiri Moisesi:

—Kontsae enoku kameti ampavatsaasetanakempaniri magatiro Ejipitoku onkantanakera pitse pitse pitse.

²²Yogari Moisesi yakontsaanake enoku oga okenake apavatsaasetanaka magatiro Ejipitoku okantanaketyo pitse pitse pitse ²³mavati kutagiteri. Tyampa inkantaignaempa ineavakagaigaempara Ejipitokunirira, teranika tatoita koneatumataatsine, aikiro tyampa inkantaignaempa iranuiivaigeigaera kantaka okañotakara maika kigonkero omavatanakara kutagiteri. Intaganivani koneagitetakogaatsi iseraereegi. ²⁴Impo yogari paraon ikaemakagantakeri Moisesi ikantiri:

—Maika piaige povetsikaigakiterora ikantaignakempirira Tasorintsi. Kametitate pintentaiganakerira pitomiegi ontiri pishintoegi, kantankicha garatyopamaigiri povishaegite intiri pivakaegine.

²⁵Inianake Moisesi ikantiri: ...

²⁶—Namaiganaerityo maganiro nopiraegi, garatyo nokumaiganake paniro, irirotari nagaigake nontagaigakenerira Notinkami Tasorintsi, kantankicha maika tekya nogoige akarika nagaigake nontagaigakenerira. Antari nogonkeigakempara anta ario pinkante nogoigake.

²⁷Kantankicha paraon ariompatyoshoishintsitanakeri teratyo inkoge irapakuaigerira, irirotari kañotagakeri maika Tasorintsi. ²⁸Impo ikantiri Moisesi:

—Piataetyo, maika garatyopineimaataana. Antari pimpokaaterika pineaenara pinkamaketyo.

²⁹Ikanti irirori:

—Kametitaketyo, garatyononeima-taimpi.

**Ikantakera Tasorintsi inkamageigakera
itsitikiigakerira Ejipitokunirira**

11 ¹Impogini yogari Tasorintsi ikantiri Moiseshi:

—Maika panivati nantsipereakageri paraon intiegiri maganiro Ejipitokunirira impo ovashi irapakuaigampi piaigaera parikoti, inkatimaigakempityo intigankai-gakempira. ²Maika piniaigakerira maganiro pitovaireegi pinkantaigakerira iriaigakera paniropage ineviigakerira Ejipitokunirira choenitakoigakaririra impaigakerira nenketsikipage intiri aikiro yogashigempitaganirira gempitantsiku yovetsikantunkanirira perata intiri kori. Ario onkañoigake tsinaneegi iroroegi.

³Yogari Ejipitokunirira ishineventai-gakaritari iseraereegi intiri aikiro Moiseshi ishineventaiganakarityo kara ineaigakeri paio yagaveavageti. Ario ikañoigake inampina paraon intiegiri aikiro maganiro, irirotari kañotagakero maika Tasorintsi.

⁴Impo yogari Moiseshi ikantiri paraon:

—Ikantake Tasorintsi: ‘Onigankigitetana-
nakera nanuivagetake aka Ejipitoku
⁵nogamagaigakerira maganiro itomiegi
itsitikiigakerira Ejipitokunirira. Nomata-
keri aikiro itsitikitakerira koveenkari
paraon nonkaratagavagetanakeri
otsitikitakerira nampiriansiegi terira
ompaitumaigempa. Nomaigakeri aikiro
piratsipage nogamagaigakeri iketyorira
tsitikitankitsi yovoitakera. ⁶Inkaemavava-
geigaketyo kara Ejipitokunirira inkenkiai-
gakerira itomiegi. Tera oneimagetenkani
onkañotera maika, aikiro garatyo
oneimataagani impogini. ⁷Kantankicha
yogari iseraereegi garatyo tyara nokantu-
maigiri. Ario inkañoigake aikiro ipiraegi
garatyo ikamumati paniro. Ario onkaño-
takempa maika kameti pogoigakeniri
nashirikoigakeri iseraereegi nashintaiga-
karira.’ ⁸Impo irishigateigapaakena

maganiro pinampinaegi inkanagaventai-
gakenara inkantaigakenara: ‘Maika
piatepagenityo pintentaiganakerira
maganiro pitovaireegi.’ Ovashi noatake.

Impo ikisamatanakatyo ikontetapa-
nuti. ⁹Impo yogari Tasorintsi ikantiri:

—Yogari paraon gara ikematsaigimpi
kameti noneakagaigakeriniri Ejipitoku-
nirira posante terira oneimagetenkani.

Pasekoa

12 ¹Impogini yogari Tasorintsi
iniakeri Moiseshi intiri Aaron
ikantiri:

²‘Yokari yoka kashiri iriro pimpegai-
gake kashiri 1 omirinka shiriagarini.

³Maika piniaigakerira maganiro pitovai-
reegi pinkantaigakerira tsinanetakoigan-
kitsirira: ‘Aganakempara kutagiteri 10
paniropage pagageigakera paniro ovisha.

⁴Antari garika itovaigi piitaneegi
timavankoaigakempirira onti pinteai-
gakeri choenitakoigakempirira kameti
pintsonkaigakeriniri pogaigakempirira.

Antari pintovaigakerika panirotyo
pampuntaigakempari. ⁵Yogari ovisha
pagaigakerira garatyo tyara ikantumata,
onti inkametitananotake. Inti pagaigake
surari shiriagakotanankicharira patiro,
irirorika ovisha intirika kavera.

⁶Impogini aganakempara kutagiteri 14
ario povetisaigakeri. Onti povetisaigana-
keri panikyara onchapinitanae. ⁷Ogari
iriraa pagaigakero pimpintavoatantaiga-
kemparora inchapoa sotsimorokutirira
ontiri aikiro enokutankitsirira. ⁸Impo
onchapinitanakera ario pogaigakempari,
onti pintashiigakeri tsitsiku. Onti
pisomankantaigakempari pan terira
onkonogempa opoegantarira. Antari
pogaigakemparira onti pintentagantaiga-
kempari pankirintsishipage kepishiri.

⁹Gara pogumaigari kanianiro, aikiro
gara ponkoigiri, ontityo pintashiigakeri
tsitsiku maganiro igitto, igitipage ontiri

iranigaki ontiri aikiro iriraapana magatiro. ¹⁰Pintsonkatasanoigakerityo pogaigakemparira maganiro. Gara pogaiganai pogaigamanaemparira. Antari aiñokyarika irinae pintagaigakerityo tsitsiku. ¹¹Antari pisekataigakempara povetsikageigakempa pogaguigakempa pimanchaki piatantaiganakemparira. Pisapatogeigakempa, aikiro pampagoigake pigotikiro, impo pinkati-maigakero pisekataigakempara, ontitari Ivasekoate Tasorintsi. ¹²Ikantaketari irirori: Aganakempara nigankigite nompokake Ejipitoku nogamagaigakerira maganiro itomegi Ejipitokunirira iketyorira itsitikiigake. Gara paniro nogamagaigiri iriroegi, nomatanakerityo aikiro ipiraegi nogamagutaigakerira iketyorira tsitikitankitsi yovoitakera. Nonkisashiigakemparityo maganiro ipageigirira itasorintsite Ejipitokunirira, nantitari Tasorintsi.

¹³“Antari nompokakera noneapaakerorika iriraa pipintavoatakerora sotsimoroku pankotsi pinantaigakerira gara nomaigimpi viroegi onti nonkenaguiganakempi. ¹⁴Kantaka onkañotakera maika omirinka shiriagarini aganaempara oka kutagiteri povetsikaigake piviesetaegite pisureigaemparora nokenaguiganakempira nogavisaakoigakempira. Omirinka ario inkañoigakempa maganiro piyashikiiganakerira impogini kantakani isureigemparora, narotari kantankitsi. ¹⁵Onti pogunteigakempa pan terira onkonogempa opoegantarira kigonkero aganakempara 7 kutagiteri. Antari pintsitiiganakerora pogaigakemparora pokageigakeroty magatiro opoegantarira ganiri otimumati pivankoeigiku. Maganirotari tyanirika gakemparone konogankicharira opoegantarira ganigetyo nokañotagaari nashintarira. ¹⁶Antari pintsitiiganakerora onti pampatoventaigakena. Ario

pinkañoigaero aikiro aganakempara 7 kutagiteri. Garatyo pantavagetumaigi, intagati onkotakenkanira pogaigakemparira. ¹⁷Kantakani onkañotakempara maika omirinka shiriagarini pogunteigakempa pan terira onkonogempa opoegantarira kigonkero aganakempara 7 kutagiteri pisureigaemparora oka kutagiteri namantaiganaimpirira parikoti pinaigavetakara Ejipitoku. Ario inkañoigakempa aikiro maganiro piyashikiiganakerira impogini.

¹⁸Omirinka shiriagarini iraganaempara kashiri 1 ario pogaigaemparo. Onti pintsitiantaiganakemparo kutagiteri 14 onchapinitanaera kigonkero aganakempara kutagiteri 21 onchapinitanaera.”

²¹Impo yogari Moiseshi ikaemaigakeri maganiro itinkamegi iseraereegi ikantaigiri: “Paniropage viroegi pagageigakera paniro ovisha povetsikaigakerira kameti inkenaguiganakempiniri Tasorintsi ganiri ipogereagimpi viroegi aikiro.

²²Ogari iriraa pagajaigakero poyagaigakerora, impo pagaigake isopo pogiaataigakerora pimpintavoatantaigakemparora inchapoa sotsimorokutirira ontiri enokutankitsirira impo gara tyani kontetumatatsi sotsi kigonkero onkutagitetanakera. ²³Iripokaketari Tasorintsi irogamagaigakerira Ejipitokunirira. Antari ineapaakerora iriraa ovisha pipintavoatakerora inchapoa sotsimorokutirira gara yogiagiri Gamagantankitsinerira onti inkenaguiganakempi. ²⁴Kantakani pinkañoigakempara maika viroegi intiegiri aikiro piyashikiiganakerira. Omirinka shiriagarini pisureigaemparo, intitari kantankitsi Tasorintsi. ²⁵Antari piaigakera pintimaigakera anta kipatsiku ikantakerira Tasorintsi impaigakempirora kantakani pisureigaemparora oka povetsikaigakera piviesetaegite. ²⁶Impo inkantaigakempirika pitomegi: ‘¿Tatatyo oitara povetsikaigakera?’, ²⁷viroegi pinkantaigeri: ‘Onti nosureigaa-

rora pairani ipokakera Tasorintsi irogamagaigakerira Ejipitokunirira, kantankicha naroege onti ikenaguiganakena ineakerora iriraa ovisha novetisaigakerira.’ ”

Iroro ikemaigakera maganiro ishineventaiganakari Tasorintsi ikanagaventaiganakarira. ²⁸Impo ovashi iaigake itsatagaigakerora magatiro ikantakeririra Tasorintsi Moiseshi intiri Aaron.

Ikamaigakera Ejipitokunirira

²⁹Impogini onigankigitetanakera ipokake Tasorintsi yogamagaigakerira maganiro itomiegi Ejipitokunirira iketyorira itsitikiigake. Yogamagakeri iketyorira itsitikitake koveenkari paraon kigonkero ikaratagavagetanakeri itsitikitakerira shitakotankicharira, imatakeri aikiro ipiraegi iketyorira tsitikitankitsi yovoitakera. ³⁰Impo itinaanaka paraon nigankigiteku intiri inampinaegi intiri aikiro maganiro Ejipitokunirira ikaemavavageigaketyo kara, teranika ontimumate patiro pankotsi garira itimi igamaga.

³¹Yogari paraon ikaemakagantakeri Moiseshi intiri Aaron tsitenigetiku ikantiri:

—Maikari maika piaigepage shintsi pintentaiganakerira maganiro pitovaireegi piaigakera pintagaigakenerira Tasorintsi pipiraegi pinkanagaventaigakemparira, ariotari pikantaigakeri chapi. ³²Pamaiganakerira povishaegite intiri pivakaegine piaigakera, irorotari pikogaigake viroegi. Piniaventaigakenara naro aikiro.

³³Yogaegiri Ejipitokunirira ikatimaigakerityo itigankaigakerira ikantaigaketari: “Panikya ampogereaigakempa maganiro.”

Ovashi iaiganai maganiro, intitari tentaiganaari Tasorintsi. Atake avisanake 430 shiriagarini inaigakera iseraereegi Ejipitoku. Antari iaiganaira ikaravageigaketyo maganiro surariegi 600,000. Ogari tsinaneegi intiri ananekiegi tera irogoigenkani.

13 ¹Impogini yogari Tasorintsi ikantiri Moiseshi:

²“Maikari maika maganiro pitomiegi iketyorira tsitikitankitsine pashintagai-gakenarira. Ario pinkaŋotagaigakeri aikiro maganiro pipirapageegi tsitikitankitsinerira pashintagaigakenari.”

Menkori ontiri tsitsi

¹⁷Antari yapakuaigairira paraon iriaigaera parikoti yogari Tasorintsi tera ario inkenakagaigeri igipatsiteku pirishiteoege. Ochoenivetakatyo, kantankicha onti ikantake: “Onti iromana-tavakagaigakempa impo inkantaiganake: ‘Gamerakari nopokaigi’, ovashi impigaiganae Ejipitoku.” ¹⁸Nerotyo onti ikenakagaganakeri osarigagitetapaakera onakera Kiraamonkiari Inkaare. Iriroegi yamageigake yomanatantaigarira. ¹⁹Yogari Moiseshi yamanairo aikiro itonki Jose, irirotari kantaigakeririra yashikiiganakeririra iseraereegi ikanti: “Arisanotyo yogari Tasorintsi gara imagisantaigimpí, onti isureigaempi iramaiganaempira parikoti. Antari iramaiganaempira parikoti pamaiganaerora notonki irorori.”

²⁰Impogini iaiganake iponiaiganaka Sokotiku kigonkero yogavageigiro Etamaku, ario imagaigake. Karari kara onti okaratakera osarigagitetapaakera.

²¹Yogari Tasorintsi itentaiganakari. Antari kutagiteriku onti yogiivaigakeneri menkori ompote iroroniri impampiaiganake. Antari sagiteniku onti yogiivaigakeneri tsitsi otsivoiganakerira kameti iranuitanikaiganakeniri aikiro. ²²Okantanityo oivaiganakeri menkori kutagiteriku. Antari sagiteniku okantakani otsivoiganakeri tsitsi.

Imonteaiaganakarora iseraereegi Kiraamonkiari Inkaare

14 ¹Impogini yogari Tasorintsi ikantiri Moiseshi:

²“Pinkantaigakerira pitovaireegi iriaigakera oatakara Piaireteku irimagai-gapaakera otsapiaku inkaare Vaareseponku ochoenitakera Migurore.

³Inkantaketari paraon inkante: ‘Mataka okaigaka osarigagitetapaakera tyampa inkenaigake.’ ⁴Impo impatimaigakempi, narotari kañotagakerine maika kameti ineakenaniri irirori intiegiri aikiro isoraroegite paio nagaveavageti. Ario inkañoigake aikiro maganiro Ejipitokunirira irogoigake nanti Tasorintsisanorira.”

Impo iriroegi itsatagaigakero ikantai-gakeririra iaigake.

⁵Impogini ikamantunkani paraon ishigaiganakara iseraereegi ogatyō ikenake ikisamatanakatyō irirori intiegiri aikiro inampinaegi ikantaiganakera:

—¿Tyara akantaigakara apakuaigakerira iriaigakera? Maika tyanimpatyō tavagetimoigajaene.

⁶Ovashi yovetsikakagantanakero ishigakotantarira, aikiro yagageiganakeri maganiro isoraroegite. ⁷Yaganake 600 ishigakotantaigarira yomanatavakagairaga pairorira avisake okametitasanotira. Aikiro yamaiganakero magatiro otovaire oshigakotantaganirira nankitsirira Ejipitoku. Patiropage onti ikenantakaro paniro itinkamiegi soraroegi. ⁸Impo iaigake ipatimaiganakerira iseraereegi, ineaketari atake ishigaiganaka yamageiganakera posantepage kametiripage yashintageigarira Ejipitokunirira. Onti ikañotakero maika paraon ipatimaiganakerira irirotari kañotagakeri maika Tasorintsi. ⁹Antari ipatimaiganakerira itentaiganakari maganiro isoraroegite. Yamanakero aikiro magatiro ishigakotantaigarira intiegiri aikiro maganiro igavayopagete, ario ineventakoigapaakari Piaireteku Vaareseponku. ¹⁰Antari ichoenitakoigapaakarira iriroegi ineventa-koigavakari ikenai-gapaakera ogatyō ikenai-gake itsarogaveiganaketyō kara

ikantaigakeri Tasorintsi iragamaakoigakemparira. ¹¹Impo ikantaigiri Moiseshe:

—¿Matsi tera ontime Ejipitoku kipatsi nonkitatantaigakemparira nonkamaiganaera nerotyō pamaigakenara aka nonkamaigakera parikoti osarigagitetapaakera? ¿Antari gara pikañoigana maika? ¿Antari gara pamaigana aka?

¹²Nokantaigavetakempiniroro anta Ejipitoku nokantaigi: ‘Gara pitentaigana, kametitaketyō nantavagetimoigakerira Ejipitokunirira. Pairo avisake okametitakera nantavagetimoigakerira avisake nonkamaigakera osarigagitetapaakera.’

¹³Kantankicha Moiseshe ikantaigiri maganiro:

—Gara pitsarogaigi. Atsi kemisanta-koigempa. Yogari Tasorintsi impugamentaiganakempitari maika. Maganiro iriroegi gatanika pineimaigairi. ¹⁴Yogari Tasorintsi irirotiyō pugamentaiganakempine ovashi pogavageiganake kavako.

¹⁵Impo yogari Tasorintsi ikantiri Moiseshe:

—Maika intaga piniaigana. Kantaigiri iriaiganakera. ¹⁶Virori noshikero pigotikiro pampagotakerora pankontsaakagakerora inkaareku ompatuaatanakera ompuonkatanakera niganki kameti inkenaiganakera. ¹⁷Yogaigiri Ejipitokunirira impatimaiganakempi, narotari kañotagaigakerine maika impo nompogereaigakeri maganiro isoraroegite paraon nomatakero aikiro ishigakotantaigarira intiri aikiro igavayopagete, ¹⁸ovashi irogoigake maganiro Ejipitokunirira nanti Tasorintsisanorira paio navisakeri paraon.

¹⁹Impo yogari isaankariite Tasorintsi ivatanankitsirira menkoriku ariokya iatake itishitaegiku yompogitanakera ²⁰itikakoiganakerira. Antari ochapinitanakera ogari menkori ariokya opeganaa tsitsi otsivoiganairira iseraereegi, kantankicha yogaigiri Ejipitokunirira onti ineai-gakero pavatsaasemataka,

nerotyo tyampa inkantaigakempa iraiñoniigakemparira.

²¹Impo yogari Moiseshi iatake otsapiaku inkaare yakontsaanakera oga okenake otampiavagetanake tampia jiririri oponiaenkataka ikontetira poreatsiri kigonkero okutagitetanakera ovashi opatuaatanake nigankia. Okañotaka magatiro maika, irirotari kañotagakero Tasorintsi orovatsatanotanakera kipatsi.

²²Apatoatanaka nia katonko ontiri kamatikya opuonkatanakera inkaare, impo yogaegi iseraereegi ikenaiganake opuonkatakera imonteaiganakara.

²³Impo yogaegiri isoraroegite paraon ipatimaiganakeri ikenaiganakera iriroegi aikiro opuonkatakera. Yamaiganakero ishigakotantaigarira intiri aikiro igavayoege. ²⁴Yogari Tasorintsi inake anta menkoriku tsitsiku. Impo okutagite-tamanakera ipampogiaigakeri Ejipitokunirira itasonkakoigakeri yomintsarogai-gakerira tyampaty inkantaigakempa.

²⁵Aikiro ogari otenempogoi ishigakotantaigarira ogaty okenake otsokiagetanaka tyampa onkantaempa oshiganaera. Impo ikantaigi iriroegi:

—Tsamekario ashigaiganakera, ipugamentaiganakeritari Tasorintsi iseraereegi, aroegi onti ikisashiiganakai.

²⁶Kantankicha yogari Tasorintsi ikantiri Moiseshi:

—Kontsajae aikiro inkaareku ampamankakoiganakerira Ejipitokunirira ontiri ishigakotantaigarira intiri aikiro igavayoege.

²⁷Ario ikañotakero irirori yakontsaanake inkaareku impo okutagitetasotanakera ogaty okenai nia apamankanairo magatiro. Ishigaigavetanaka Ejipitokunirira kantankicha agaigavakeri ovashi iokaavioigaka maganiro, irirotari kañotagakero maika Tasorintsi.

²⁸Nerotyo apamankakotantaiganakaririra isoraroegite paraon ontiri ishigakotantaigarira intiri aikiro igavayoege. Teratyo iravisaakotumatae paniro patimaiganakeririra. ²⁹Kantankicha yogaegi iseraereegi ataketari imonteaigaka ikenaigakera opuonkatakera, apatoatakatar nia katonko ontiri kamatikya. ³⁰Ario ikañotakero maika Tasorintsi yogavisaakoigakerira ganiri yatsipereakagaigari Ejipitokunirira. Impo iriroegi ineagakeri okajaigankicharira yamaavioveigakera otsapiaku. ³¹Antari ineagakerora okañotakara maika yovetsikakera Tasorintsi terira oneimage-tenkani ipugamentaigakerira ikisashiigakarira Ejipitokunirira ovashi yogavageiganake kavako ipinkatsaiganakeri Tasorintsi ikematsatanoigakerira irirori intiri Moiseshi, irirotari iromperane.

15 ¹Impogini Moiseshi itentaigakari maganiro iseraereegi imatikaventaigakerira Tasorintsi. ...

Nia Marakutirira

²²Impogini yogari Moiseshi itentaigakari iseraereegi iaiganakera iponiaiganakarora Kiraamonkiariku Inkaare iaiganakerora osarigagitetaapaakera Shoroku. Karari kara tera ineimaigaero nia kigonkero yomavatakoiganaka kutagiteri. ²³Impogini yogonkeigapaaka Maraku, kantankicha teratyo iragaveaige iroviikaigakemparora nia timatsirira kara okepishiavagetitari, irorotari opaitankarira Mara. ^c ²⁴Impogini iriroegi ovashi ikisaiganakeri Moiseshi ikantaigakerira: —Maika ñtataty aviikaigakempara?

²⁵Impo irirori iniakeri Tasorintsi. Yogari Tasorintsi iokotagakero inchato yagakerora iokaatakerora niaku oga okenake tenige onkepishiatae ovashi yoviikaigakaro.

Impo yogari Tasorintsi iniaigakeri ineaigakerira arisanorikara inkematsai-gakeri ikantaigiri:

²⁶—Maika viroegi pinkematsaigakena-rika pintsatagaigakerora nonkantaigakem-pirira pinegintevageigakempara garatyo nogivarienkatashitumaigimpi mantsiga-rintsi nonkañotagaigakempira nogivarienkatashiigakerira Ejipitokunirira, narotari Tasorintsisanorira vegantatsirira.

²⁷Impo yogonkeigaka Erimeku, ario imagaigake ichoenitakoigakarora nia. Karari kara ontitari okonteagetake nia onake 12, aikiro ario otimake paremera^d onake 70.

Tasorintsi ipaigakerira manaa

16 ¹Impogini iaiganai maganiro iseraereegi iponiaiganakara Erimeku iaigakera osarigagitetapaakera paitacharira Sun. Ario kara yogonkeiga-paaka. Ogari otishi Sunai onti onake anta okaragetakera osarigagitetapaakera. Antari yogonkeigakara atake yaganaka kashiri 2, ogari kutagiteri onti 15. ²Impo maganiro iriroegi ikisaiganakeri Moiseshi intiri Aaron ikantaigakerira:

³—Ariome irogamagaigakena Tasorintsi anta Ejipitoku gamerorokari nopokavageigi aka osarigagitetapaakera nantsipereavageigakera agaiganakenara notasegane. Antari anta aiñotari ivatsa ontiri pan nosekatavageigara. Viroegita-kaniroro pitentaigakenaniroro aka.

⁴Kantankicha Tasorintsi ikantiri Moiseshi:

—Naro nompagakerityo pan terira ineimaigero. Impo iriroegi omirinka tsitekyamani irapatoigamanake akarika irogaigakempa patiro kutagiteri, impo ovashi noneaigakeri ariorika inkematsai-gakena nonkantaigakerira. ⁵Kantankicha omirinka aganakempara kutagiteri 6

ario pinkante irapatoigamanake akarika irogaigakempa piteti kutagiteri.

⁶Impo yogari Moiseshi intiri Aaron ikantaigiri maganiro:

—Paita panikyara irishonkanaempa poreatsiri yogari Tasorintsi irogikoneati-moigakempi pashini terira pineimaigero viroegi kameti pogotasanoigakeniri iriro tentaigakempi aka. ⁷⁻⁸Impo onkutagiteta-manakera irogikoneatimoigakempi pashini kameti pogotasanoigakeniri arisano yagaveavageti irirori, ikemaigakempitari piniashinaiganakarira, irirotari piniashinai-gaka pikisaigavetakenara naroege, teranika naroege Tasorintsi kameti nompagakem-pira pikogakoigakarira. Maika panikyara irishonkanaempa poreatsiri irirori impaiga-kempi ivatsa. Antari onkutagitetamana-kera onti impaigakempi pan kameti pisekatavageigakempara pinkemamonki-vageigakempara.

⁹Impo yogari Moiseshi ikantiri Aaron:

—Maika kantaigiri maganiro irapato-ventaigakemparira Tasorintsi impo irirori iriniaigakerira, ikemaigakeritari iniashinaigakarira.

¹⁰Impo irirori yapatoitaigakeri iniaigakerira. Impo aiñokyara iniaiga-keri ishonkaiganaka oatakara osarigagi-tetapaakera ineaigutarityo Tasorintsi ishimpokirerenkanakera menkoriku.

¹¹Impo irirori iniakeri Moiseshi ikantiri:

¹²—Naro nokemaigakeri iniashinaiga-kenara yogaegi iseraereegi. Maika pinkamantaigakerira paita onchapinita-nakera irogaigakempa ivatsa. Antari onkutagitetamanakera onti irogaiga-kempa pan kameti irogoigakera nanti Itinkami, nantitari Tasorintsisanorira.

¹³Impo ario okañotaka. Panikyara irishonkanaempa poreatsiri ipokaiga-paake kentsori itsaisevagetapaakatyo kara yapagiteanakarotyo iniaigakera.

Antari okutagitetaanakera ineaigakero tsoatuivagetaka sotsi onkuatakoigakari inaigakera. ¹⁴Impo orogitetanaira onti okusotanake kanurotavagetake entyata-vagetake akamentyakiegiti onkutava-gete kara. ¹⁵Iroero ineaigakerora iseraereegi ikantavakagaiganaka:

—¿Tatatyo oitara oka?

Teranika irogoige tatoita.

Yogari Moiseshi ikantaigiri:

—Onti pan ipaigakempirira Tasorintsi pogaigakempirira. ¹⁶Irirori ikantake: ‘Paniropage iragaigake akarika irogaigakempa. Iragaigakeneri aikiro maganiro timavankoagilirira, paniropage onti iragaigakeneri 8 tasa.’

¹⁷Impo iriroegi ario ikañoigakero, ikonogagarantaigaka paio yagasanoigake, pashini ogakona yagaigake. ¹⁸Impo yamaiganakero pankotsiku yogoigakerora kigonkero oganakero okatinkaiganakerira paniropage 8 tasa. Yogaegiri gasanoigankitsirira okigonkerotasanotakatyo 8 tasa irashiegi paniropage, tera avisumate. Ario ikañoigaka aikiro terira iragasanoige okigonkerotakatyo.

¹⁹Yogari Moiseshi ikantaigiri:

—Pintsonkatasanoigakerora magatiro gara pogumaiganai ashi kamani.

²⁰Kantankicha iriroegi teratyoko inkematsaigiri. Ikonogagarantaigaka yogaiganakero irogaigaempirora onkutagitetaanakera, impo okutagitevetanaka paa kenitake shititake ovashi ikisaigakeri Moiseshi.

²¹Impo omirinka ikañoigakero maika omirinka tsitekyamani yapatoigamanai akarika irogaigakempa. ³¹Impo antari iporeanaira oga okenake oveankanaa.

Impo iriroegi ipaigakero manaa. Onti okutatake okañotakaro okitsoki korantero. Onti opochatake okañotakaro pan okonogaganira pitsi. ³²Impo ikanti Moiseshi:

—Ikantake Tasorintsi: ‘Pagaigakera 8 tasa manaa poyagaigakerora kovitiku

pogaigakerora ineaigakerora piyashikii-ganakerira irogoigakera iroero nopaigakempi pogaigakempirira aka osarigagitetapaakera nagaigaatimpira Ejipitoku.’

³³Impo ikantiri Aaron:

—Pagakera koviti poyagakera manaa 8 tasa pogakerora ivankoku Tasorintsi, kantakani onakera kara kameti ineaigakeroniri maganiro iyashikiiganakerira maganiro iseraereegi impogini.

³⁴Impogini yogari Aaron itsatagakero ikantakeririra Tasorintsi Moiseshi yoyagakotakero kajonakiku nankitsirira ivankoku Tasorintsi.

³⁵Iriroegi omirinka yogunteigaka manaa kigonkero agavagetanaka 40 shiriagarini yogonkeigakara Kanaanku.

Yogikonteatakerora Moiseshi nia imperitaku

17 ¹Impogini yogari Tasorintsi ikantaigakeri maganiro iseraereegi iriaigakera Irepirimiku. Impo iaiganake iponiaiganakara Sunku iaigake imagaigapaake Irepirimiku, kantankicha tera ontime nia tatampa iroviikaigakempa. ²Ovashi ikisaiganakeri Moiseshi ikantaigiri:

—Paigenanityo nia noviiikaigakempara. Irirori ikantaigiri:

—¿Antari gara pikisaigana? ¿Antari gara pikañoiga maika? ¿Matsi tera pinkematsaigeri Tasorintsi nerotyo pikogantaigakarira maika ineakagaigakempira arisanorikara itentaigakempi ontirika tera intentaigempi?

³Impo iriroegi imiregeiganaketyo kara ovashi ikantaigakeri Moiseshi:

—Gamerakari pamaigana aka nantsipe-reavageigakera nomire agaiganakenara maganiro naroege intiegiri notomiegi intiegiri aikiro nopiraegi.

⁴Impo irirori iniakeri Tasorintsi ikantiri:

—¿Tyarikatyoko nonkantaigakerira yokaegi? Panikya impitankaiganakena.

⁵⁻⁶Yogari Tasorintsi ikantiri:

—Piate pintentaiganakerira maganiro imperitaku Orevekutirira, kantankicha yogaegiri itinkamiegi pagagarantaigana-keri pintentaiganakerira piivaiganakera. Pamanakerora aikiro pigotikiro pipasaatantakarorira nia Ejipitokutirira. Narori ario nonake kara. Impo viro pimpasatatero imperita onkonteatana-kera nia iroviikaigakempara maganiro.

Impo irirori ario ikañotakero, ineai-geri itinkamiegi iseraereegi. ⁷Yogari Moiseshi ovashi ipaitakero imperita Masa ontiri Meriva, ariotari kara ipugatsaigakariri Tasorintsi, aikiro yotsimajaigakeri ikantaigakera: “Teroro-kari intentaigajae Tasorintsi.”

Iseraereegi Sunaiku

19 ¹⁻²Impogini yogaegi iseraereegi iponiaigaka Irepirimiku iaiganakera osarigagitetapaakera paitacharira Sunai imagaigapaake kara okaratakera otishi Sunai. Inti yogonketantaigaka kashiri 3. Ogari kutagiteri onti 1. Ario okañotakaro okyara iponiaigaara Ejipitoku kutagiteriku 1. ³Impo yogari Moiseshi itonkoanake otishiku, ikogaketari Tasorintsi iriniakerira. Impo antari itonkoanakera ikemakari iniakerira ikantakerira:

—Pinkantaigakerira iseraereegi iyashikiiganakerira Jakovo pinkante: ‘Ikantake Tasorintsi: ⁴Viroegi pineaigake tyara nokantaigakeri Ejipitokunirira nopogereaigakerira nopugamentaigakempira. Onti nagaigaatimpi Ejipitoku nogavisaakoigakempira, notsarogakagai-gakempitari ovashi nagamaakoigakempi kigonkero namaigakempi aka. ⁵Maikari maika pinkematsaigakenarika pintsatagasanoigakerora nonkantaigakempirira nashintasanoigakempityo nontasanoigakempira. Aiñoigavetakatyto tovaini matsigenkaegi timageigatsirira kipatsiku, kantankicha intaganityo

viroegi nokogakagaigake nashintasanoi-gakempira. Naro nashintagitearo magatiro, ⁶kantankicha intagani viroegi nokogakagaigake nashintaigakempira kameti nompegakempara Pigoveenkarie-gite, aikiro viroegi pinkañoigakemparira saseroroteegi pimpiriniventaigakerora magatiro nokogagetirira naro.’ Maika irorotari nokogake pinkamantaigakerira iseraereegi.

⁷Impo yogari Moiseshi ipigaa inaigakera maganiro ikaemaigakeri itinkamiegi ikamantageigakerira magatiro ikantakeririra Tasorintsi inkantaigakerira. ⁸Impo maganirosano-tyo iriroegi ikantaigake:

—Magatiro ikantakerira Tasorintsi nontsatagaigakerotyto.

Impo yogari Moiseshi irirokya kaman-takeri Tasorintsi ikantaigakerira iriroegi maganiro. ⁹Impo yogari Tasorintsi ikantiri:

—Maikari maika nompokake noniakempira, onti nonantakempa menkori naamokakotake nampavatsaase-takotakempa, nokogaketari inkemaigake-nara maganiro noniakempira kameti kantakaniniri inkematsaigakempira. ¹⁰Maika plate pinkantaigakerira maganiro irovetsikaigavakempara maika ontiri kamani. Pinkantaigakerira inkaataigakera, aikiro inkivatsaraigakem-para kameti irisaankaigakeniri, ¹¹nompokaketari omavatanakempara kutagiteri ineaiakenara maganiro naguitakera otishiku Sunai. ¹²Impo pokotagaigakeri tyara onkaratake iriageigakerora. Pintika-koigakeri ganiri ipokumaigi aka otishiku pinkantaigakerira: ‘Tsikyanira piaigikari otishiku, aikiro garatyto pagatikumaigiro okaragetakera. Tyanirika gatikakerone irogakenkanityo, ¹³kantankicha garatyto yairikumatagani, onti impitankakenkani ontirika inkentakenkani. Ario inkañotaga-kenkani maika tyanirika gatikakerone,

irirorika piratsi intirika matsigenka, inkamaketyo.' Antari pinkemaigavake-rora ompoimatanakera tivorintsi ario piaigake paiñoniiganakempara otishiku.

¹⁴Impo irirori ipigaa ikantaigapaake-rira maganiro inkaataigakera, aikiro inkivatsaraigakempara irisaankaigake-niri. Impo ario ikañoigakero. ¹⁵Impo ikantaigiri aikiro:

—Povetsikaigavakempara pogiaigava-kerira Tasorintsi iripokakera omavata-nakempara kutagiteri. Gara pineaigairo pitsinanetsiegite.

¹⁶Impogini omavatanakara kutagiteri tsitekyamani ikemaigavakero kareti okantanakera pugarara pugarara. Ogaty okenake omenkorisekantanake otishiku apavatsaasetanakaty kara. Opoimatanake tivorintsi omaraenkarikatyo kara. Ogaty ikenagake itsarogavageiganake maganiro ishigekavageiganaketyo kara. ¹⁷Impo yogari Moiseshi itentaiganakari okarata-kerira otishi inakera Tasorintsi. Ario inaigapaake kara. ¹⁸Magatiro otishi otinkamisetanake, yaguitaketari Tasorintsi tsitsiku. Otinkamisevagetanaketyo kara kañomatakaty opotaganira tsamairintsi. ¹⁹Otininkanakaty otishi okantanaketyo tinin tinin tinin. Ogari tivorintsi ariomp-tyo opoimatasananakari omaraenkarika-tyo kara. Impo yogari Moiseshi itentakari Tasorintsi iniavakagaigakara. Antari iniakera Tasorintsi imaraenkarikatyo kara kañotakatyo kareti. ²⁰Ario okañotaka maika yaguitakera Tasorintsi ochovaanka-kerira otishi Sunai ikaemakerira Moiseshi iriatakera anta inakera irirori. ²¹Impo yogari Tasorintsi ikantiri Moiseshi:

—Piatae pinkantaigakerira maganiro iseraereegi gara yavisumaigiro pitikako-tantaigakaririra. Gara ipokaigi ineaga-kenara ganiri nopogereaigiri. ²²Aikiro pinkantaigakerira saseroroteegi niaiganarira irisaankasanoigakempara ganiri nopogereaigiri iriroegi aikiro.

²³Impo ikanti irirori:

—Iriroegi gara yagaveaigi iripokaiga-kerira aka otishiku pikantaketari: 'Pokotagaigakerira tyara onkaratake iriageigakerora pintikakoigakerira ganiri ipokaigi aka nonakera naro.'

²⁴Kantankicha yogari Tasorintsi ikantiri:

—Maika plate pinkantaigakerira maganiro iriroegi intiegiri saseroroteegi gara yavisumaigiro pitikakotantaiga-kerira ganiri ipokaigi aka naroku onti nopmogereaigakeri. Intagani viro pokankitsine pintentakemparira Aaron.

²⁵Impo irirori ipokai ikamantageiga-keri maganiro.

Ikantaigakeririra Tasorintsi iseraereegi

20 ¹Yogari Tasorintsi ikanti: ²"Naro nanti Pitinkami, nantitari Tasorintsisanorira. Narotari gaatimpi pinavetakara anta Ejipitoku yatsipereakagavageigakempira yantava-getagavageigakempira.

³"Maikari maika garatyo pipegumati pashini pitasorintsite, panirosanoty naro nonkantakempara pinkematsakenara.

⁴"Aikiro garatyo povetsiki tatarika oita pimpegakerira pitasorintsite kogapage pinkañotagakemparira tatarika iita timagetatsi kipatsiku, irirorika pinkañota-gakempa aragetatsirira, kamarigetatsirira intirika timaagetatsirira niaku. ⁵Garatyo pikanagaventaigari, aikiro garatyo tatoita pipumaigiri, nantitari Pitinkami, aikiro nanti Tasorintsisanorira. Notsaneakempi tera nonkoge pimpegageigakera pashini pitasorintsiiegite kogapage. Omirinka noneaigakeri maganiro kisashiiganarira impo ario nokañotaka naro nokisashiiga-kari aikiro, nomaiganakerityo itomiegi, ivisariegite intiri iyashikiiganakerira.

⁶Kantankicha notsarogakagaigari magani-rosano tyanirika tasanoigana tsatagaigiro-rira nokantirira naro.

⁷“Pimpinkatsatasanotakenara, garatyo piniakotiro novairo kogapage, nonkisa-shiigakemparitari maganiro tyanirika niakotakerone kogapage.

⁸“Pampishigopireantakemparora kutagiteri apishigopireantaganirira gara pantavagetantaro. ⁹Intagati pantavagetake 6 kutagiteri. ¹⁰Ogari kutagiteri 7 iroro pampishigopireantakempa gara pantumati, ontitari nogutagiterite. Garatyo tatakona pantumati viro intiri pitomi, pishinto, ponampiria surari ontiri tsinane. Aikiro garatyo pantakagumaigiri pipiraegi. Ario inkañotake pashinigitikunirira nankitsinerira viroegiku garatyo yantumati. ¹¹Ariotari nokañotakerori naro novetsikagetakerora inkite ontiri kipatsi, omaraani nia ontiri aikiro magatiro timantagetarorira, intagati nantantagetakaro 6 kutagiteri impo ogari kutagiteri 7 iroro napishigopireantaka ovashi nokantake gara antavagetantumatagani oga kutagiteri.

¹²“Pimpinkatsaigakerira piri ontiri piniro gara pipugatsanaigari kameti samaniniri pinegiteakero kutagiteri anta kipatsiku nompakempirira.

¹³“Garatyo poganti.

¹⁴“Garatyo piatashitiro tsinane.

¹⁵“Garatyo pikoshiti.

¹⁶“Garatyo pitsoeventari pitovaire.

¹⁷“Garatyo pikogutantiro yashintagetarira pashini, irororika ivanko ontirika tatarika oita. Aikiro garatyo pikogi pashintutakemparira ironampiria surari ontirika tsinane. Ario inkañotake itorone intiri iashinote garatyo pikogi pashintutakemparira. Garatyo pineakotiri itsinanetsite.”

Itsarogaiganakera iseraereegi

¹⁸Maganiro iseraereegi ineaigakero kareti okantanakera pugarara pugarara, aikiro ikemaigakero opoimatanakera tivorintsi. Ineaigakero aikiro otinkamise-

kantanakera otishi. Iroro ineaigakerora okañotakara maika itsarogavageiganaketyo kara ishigekavageiganake yontainaiganaka. ¹⁹Impo iriroegi ikantaigiri Moiseshi:

—Viro niaigakenane pinkamantaigakenara tyara ikanti Tasorintsi impo naroegei nonkematsaigakeri. iKantankicha gara iniaigana irirori ganiri nokamaigi!

²⁰Irirori ikantaigiri:

—Gara pitsarogaigi, ontitari ipokashitake Tasorintsi ineaigakempira arisanorika pinkematsaigakeri ontirika gara. Aikiro yogikoneatimoigakempiro iragaveane kameti pimpinkaigakeriniri ganiri pikañovageiga, onti pinkematsatananoigakeri.

²¹Impo iriroegi onti inaigake intaina. Yogari Moiseshi iatake apavatsaasetakara inakera Tasorintsi. ²²Impo yogari Tasorintsi ikantiri Moiseshi:

—Pinkantaigakerira iseraereegi: ‘Ikantake Tasorintsi: Maika viroegi pineaigakena noponiakara enoku nopokakera aka otishiku noniaigakempira. ²³Maikari maika nonkantaigakempi gara pagaigi perata intirika kori povetsikaigakera pashini pitasorintsiegite.’

Impo yogari Tasorintsi ikantagetakeri Moiseshi pashini posante inkantagakerira maganiro iseraereegi intsatagai-gakerora intimaigakeniri kameti inkematsatananoigakerira. Pati ro onti oka:

21 ¹⁷“Yogari kisashitakemparineririra iriri ontirika iriniro iroga-kenkanityo.”

Pashini onti okanti:

22 ²⁸“Garatyo pipugatsatumaigari Tasorintsi. Ario inkañoigake pitinkamiegi gara pipugatsatumaigari.”

**Moisesshi itentaigakarira itinkamiegi
iseraereegi otishiku Sunai**

24 ¹Impogini yogari Tasorintsi ikantiri Moisesshi:

—Maika piataatera inaikakera maganiro impo pimpigakera pintentakerira Aaron, Narave intiri Avio intiegiri aikiro itinkamiegi iseraereegi irinaigake 70, kantankicha iriroegi gara yaiñoniiga aka, onti inkanagaventaigakena antakona anta. ²Paniro viro paiñonitakena, kantankicha iriroegi garatyo yaiñoniiga, aikiro garatyo tyani giatumaigimpi.

³Impo yogari Moisesshi ipokai inaikakera maganiro ikamantageigapaa-keri magatiro ikantagetakeririra Tasorintsi ikogagetakerira intsatagaigakerora. Impo iriroegi maganirotyo iniaiganake ikantaigi:

—Nontsatagaigakeroty magatiro ikantakerira Tasorintsi.

⁴Impo yogari Moisesshi itsirinkagetakero magatiro ikantagetakerira Tasorintsi. Impo okutagitetanakera tsitekya-maní yovetsikakeri itagantaganirira piratsi okaratakera otishi, aikiro yogarantinkagetakero ogatsantsamapupageni mapu okaratake 12, ariotari inaikakeri itomiegi Iseraere 12. Iriroegitari yashikiiganakeririra maganiro iseraereegi. ⁵Impo itigankaigakeri ikyenkarira gaenokaiganankicha intagaigakenerira Tasorintsi piratsipage, aikiro irovetisaigakenerira akamotiakyenirira toro arioankiniri ikavintsaavageigakerira. ⁶Yogari Moisesshi yagaatagarantakero iriraa yoyagiatakerora tasoku. Ogari aityokyarira onai onti isagutantakaro itagantakarira. ⁷Impo inoshikakero sankevanti itsirinkantakarorira magatiro ikantagetakerira Tasorintsi iniavantakerora ikemaigakerira maganiro. Impo iriroegi ikantaigi:

—Nontsatagaigakeroty magatiro ikantakerira Tasorintsi, aikiro nonkema-tsatasanoigakerityo.

⁸Impo irorokya inoshikakotake iriraa yoyagiatakerira tasoku isagutantaigakarira ikantakera:

—Maika nagatake nokantaigakempira magatiro ikantakenarira Tasorintsi nonkantaigakempira, irorotari nokañotantakarorira maika nosagutantaigakempirora iraatsi kameti pogoigakeniri intsatagaigakerora Tasorintsi magatiro ikantakerira, ikantaketari irirori: ‘Maika omirinka pinkematsaiganakenara, narokya kavintsaavageigakempine.’

¹²Impogini yogari Tasorintsi ikantiri Moisesshi:

—Maika piatakera anta otishiku pogiakera nompakempira mapu notsirinkantakarorira nokogagetakerira intsatagaigakerora maganiro iseraereegi.

¹³Impo iatake Moisesshi itentanakari Josoe, irirorari inampina. ¹⁴Yogari itinkamiegi iseraereegi onti ikantaiganakeri:

—Pogaiagavaena kara, aiñotari itentaigakempí Aaron intiri Oro. Tatarika pinkogaikoigakempa iriroegi pinkantaigake.

¹⁵Impo iatanake otishiku. Ogari otishi onti apamankakero menkori. ¹⁶⁻¹⁷Maganiro iseraereegi inaikakeri Tasorintsi kara otishiku ochovaankakera kañomatakaty tsitsi opoamasetira. Ogari menkori apamankakero 6 kutagiteri, impo ogari kutagiteri 7 yogari Tasorintsi ikaemakieri Moisesshi anta menkoriseku. ¹⁸Impo irirori itonkoanake iatakera menkoriseku. Ario inake kara 40 kutagiteri.

**Tasorintsi ikantaigakerira
irovetsikaigakenerira ivanko**

25 ¹Impogini yogari Tasorintsi ikantiri Moisesshi:

²“Pinkantaigakerira iseraereegi iramageigakenara posantepage impaiga-

kenarira. Maganiro kogaigankitsinerira impaigakenara tatarika oita iramaigake-rora impaigakempirora. ³Inti iramaigakempi kori, perata, verontse ⁴ontiri aikiro kamsapage kamachonkamagori, kiraamagori ontiri kutamagori.

Iramaigake aikiro iviti kavera ⁵ontiri imeshina ovisha otsakantunkanirira kiraari ontiri aikiro pashinipage imeshinapage mehomeshinari.^e Iramaigake aikiro inchato akashia, ⁶aseite orivo ogimorekaatakenkanirira gimorekaatantachariraku, ... ⁷ontiri aikiro mapupage kametiripage. ...

⁸“Impo pinkantaigakeri irovetsikaigakenara novanko nonantakempirira anta iroegiku. ⁹Antari irovetsikaigakerora onti inkañotagaigakemparo nokotagakempirira. Irovetsikaigakero aikiro magatiro nagetankitsinerira tsompogi.”

Impo yogari Tasorintsi ikamantageta-keri Moiseshi tyara onkantakenkani magatiro ovetsikakenkanira. Oketyo ikantakeri ovetsikakenkanira kajonaki ontsotenkasanotakenkanira ontsirekantenkanira korimeshina. Antari otapoku irogaigakenkanira piteni isaankariite Tasorintsi kerovine irovetsikantakenkanira kori. Iiroegi intimpatsarankaigakero ivankipage irapinegitevakagaigakempara. Ogari mapu otsirinkantunkanirira ikantagetakeririra Tasorintsi Moiseshi onti onake tsompogi. Karari kara irinaigakera kerovine onti osagutapinitakenkani iriraa piratsipage ganiri ikisaviigiri Tasorintsi ikañovageigara iseraereegi onti intsarogakagaigakempari, ikantaketari irirori:

²²“Ario nonake kara irinaigakera kerovine otapoku kajonaki, ariotari kara

osagutapinitakenkaniri iriraa piratsipage ganiri nokisaviigiri iseraereegi ikañovageigara, onti nontsarogakagaigakempari. Ario kara noniakempi nonkantakempira magatiro pinkamantaigakerira maganiro iseraereegi.”

Impo ikantakeri aikiro ovetsikakenkanira mesa ovevirikaantakenkanirira pan ovetsikakenkanirira irashi irirori. Aikiro ikantakeri ovetsikakenkanira gimorekaatantachanerira ontiri aikiro ontagantakenkanirira kasankapaneri onkañotagakenkanira iokotagakeririra otishiku.

Impo ikantakeri aikiro tyara onkantakenkani ovetsikakenkanira ivanko kamsapanko. Ikantakeri onti ovetsikantakenkani inchakota akashia. Ogari ovankotantakempirira onti kamsapage. Oketyo ogiivatakenkani nankitsinerira savi kamisa kutamagori. Impo omatanakempa pashini kamisa ovetsikantakenkani iviti kavera. Omatakenkani aikiro imeshina ovisha. Impo ogari enokutankitsinerira onti pashini imeshinapage mehomeshinari. Impo ikantakeri aikiro ontsatamagotakenkanira kamisa tsompogi ivankoku ontikakotakerora apinakitene garira okiimatagani paitankichanerira Okantavitantaganirira Onkienkanira. Ikantakeri iramanakerora kajonaki onantagetakempirira mapu otsirinkantunkanirira ikantagetakeririra irogakerora kara tsompogi aiyyara ontsatamagotakempara kamisa. Ogari mesa onti irogakero apinakiteneku paitankichanerira Irashi Tasorintsi intentagantakemparora gimorekaatantachanerira ontiri aikiro ontagantakenkanirira kasankapaneri. Ikantakeri aikiro ontsatamagotakenkanira kamisa sotsimoroku.

e 25.5 Mehomeshinari: tera ogotenkani tatuita shintaro imeshina. Okonogaka ogishonkunkanira okantake imeshina *vaca marina*, pashini okantake imeshina *tejón*, pashinikya okantake *pieles finos*.

Impo ikantakeri ovetsikakenkanira intagantakenkanirira piratsipage, onti ovetsikantakenkani inchato akashia impo ontsotenkasanotakenkani ontsirekantakenkanira verontsemeshina. Ogakenkani sotsi ovampatuireku ivanko ontentakemparora oyagiatantakemparira nia inkivakotantaigemparira saseroroteegi. Ogari ovampatuire onti onkuatakotantakenkani kamsisapage ontsatamagogetakenkanira.

*Impo ikantakeri aikiro ovetsikageta-kenkanira pashini posantepage nage-
tantsinerira anta ivankoku.*

Impo ikantiri:

27 ²⁰“Pinkantaigakerira iseraereegi iramaigakera aseite orivo kameti onkantakaniniri omorekaatake gimorekaatantachariraku. Kantankicha onti iramaigake saanaatasanotankitsirira onti gotankichane orivo otinkagitunkanirira.

28 ¹“Impo pinkaemakagantaigakeri pirenti Aaron intiegiri itomiegi paigacharira Narave, Avio, Ereasure intiri Itamare impegaigakempara nosaseroroteegite. ²Povetsikaigakenerira irogaguigakemparira pairorira onkametitanasotake irononiri irogaguigempa inkiapiniigera novankoku kameti impinkatsaigakenkanira. Intagani iriroegi gaguigakemparone. ³Inti piniagake yogaegi nagaveakagaigakerira irogova-geigakera iravoviigera pinkantaigakerira irovetsikaigakenerira Aaron irogagutakemparira kameti irononiri irogagutempa nompegakerira nosaserorotete. ⁴...Irovet-sikaigakeneri pirenti Aaron intiegiri aikiro itomiegi kameti impegaigakempara nosaseroroteegite.”

*Impogini yogari Tasorintsi ikantage-
takeri pashini posante irovetsikageigake-
rira.*

31 ¹⁸Impo yagatakera iniakerira ipavakeri mapu itsirinkantakarorira irirori ikogagetakerira intsatagai-gakerora maganiro iseraereegi.

Itiomiani toro yovetsikakerira Aaron

32 ¹Impogini yogaegi iseraereegi ineaigakera ipegakara Moiseshi otishiku tera iripokae itashiigakeri Aaron ikantaigakerira:

—Atsi povetsikaigakenara notasorin-tsiegite tentaiganaenanerira. Yogari Moiseshi gaigaatanarira Ejipitoku teranika nogoige tyarika itsatake nerotyo tera iripokae.

²Impo irirori ikantaigiri:

—Atsi patoigiri pogashigempitaigara yovetsikantunkanirira kori pamaigakenarira. Pamaigakenari ogashigempitaigarira pitsinanetsiegite, pitomiegi ontiri pishintoegi.

³Impo iriroegi maganiro yapatoigakeri yamaigakenerira. ⁴Impo irirori yagakeri yoveankagetakeri yovetsikakerira ikañotagakarira ityomiani toro. Iroro ineaigakerira maganiro ikantaiganake:

—Neri atasorintsiegite gaigaatajairira Ejipitoku.

⁵Yogari Aaron ineaigakerira ishineventaigakarira yovetsikakerira ovashi yovetsikakeneri itagantaganirira piratsi ikantaigakerira maganiro:

—Kamani avetsikaigakeneri iviesetate Tasorintsi.

⁶Impo okutagitetamanakera itinajai-ganityo inkaara itagaigamanakenerira piratsipage irishineigakempariniri. Ovashi ipitaigake isekatavageigakara, aikiro yoviikavageigakara impo ikavirii-ganaka itamporaventaigakerira. ⁷Impo yogari Tasorintsi ikantiri Moiseshi:

—Maika piatae pinkamosoigapaakerira pagaigaatirira Ejipitoku, iriroegi matakata-ri yovetsikagisevageigake terira onkametite, teranika inkematsaigena

⁸onti shintsi yapakuaiganakero nokantai-gavetakaririra. Maika yovetsikaigake itasorintsiegite ikañotagaigakari ityomiani toro. Ikanagaventaigakari itagaigakeneri piratsipage ikantaigake: ‘iNeri atasorintsiegite gaigaatajairira Ejipitoku!’

⁹Maikari maika matakaniro noneaigakeriniro tera inkogaige inkematsaigake-nara intsatagaigakerora nokantaigakeririra. ¹⁰Maikari maika atsi nonkisashiigakemparira nompogereaigakerira. Virokya nonkavintsaavagetake nogitovaigavageigakerira piyashikiiganakerira.

¹¹Impo irirori iniaventaiganakerityo iseraereegi ikantiri:

—Tasorintsi, çtyara onkantakempara pinkisashiigakemparira pashintaigakarira pagaigaatirira Ejipitoku povetsikagemati-tyo terira oneimagentenkani pipugamentaigakerira? ¹²Antari pinkañotakerorika maika inkantaigakerorokari Ejipitokunirira: ‘Iroto yagashiigaatiri yamaiganakerira anta otishiku irogamagaigakerira impogereasanoigakerira maganiro.’ Maikari maika atsi pampitsimareanaempara ganiri pikisashiigari. ¹³Pisuretaemparira Averan, Isaako intiri Iseraere kematsaigampirira, pikantaigakeritari pikanti: ‘Nogitovaigavageigakerira piyashikiiganakerira inkañovageigana-kemparityo impokiro impo nompagaigakeri kipatsi nokashigakagakempirira ovashi inkantakanira irashintaigakemparo.’

¹⁴Impo yogari Tasorintsi ikanti:

—Irotoventi gara nokisashiigari.

¹⁵Impo ipokai Moiseshi yamagetakerora pitetiro mapu itsirinkagetakaroririra Tasorintsi ikantaigetakerira intsatagaigakerora iseraereegi. Ogari mapu pisotatetiro itsirinkagetakero.

¹⁶Tsiykata yovetsikaigetakero mapu, aikiro tsiykata itsirinkakero irirori.

¹⁷Impogini yogari Josoe ikemaigapaakeri tsigempitareimataketyo ikantiri Moiseshi:

—Atsi kemaigeriratyo kanika vetsikaignanaka iromanataigakempara.

¹⁸Ikanti irirori:

—Teratyo onkañotemparo ikaemai-gira gaveaigankitsirira yomanatakara, aikiro teratyo onkañotemparo ikaemai-gira yagaveaigunkanirira. Naro nokemake onti imatikaigake.

¹⁹Impogini yogonkevetapaaka ineagapaakeri tosoigamataketyo itosoventaigakerira ityomiani toro yovetsikaigakerira. Ogatyo ikenake ikisamatanakaty yovuokagetutaroty mapu yamavetakarira oga okenake oporokanake ontaikaka kara okaragetakera otishi. ²⁰Yogari ityomiani toro yovetsikaigakerira inoshikakeri itagakerira impo itonovatakeri iokaavanetakerrira niaku ovashi yoviikakagaigakarira maganiro. ²¹Impo ikantiri Aaron:

—¿Matsi tyara ikantaigakempira neroty pikañotakerora maika pikañovagetagagaigakarira maganiro?

²²Ikanti irirori:

—Atsi gara pikisa, pineaigiritari kantaka iriroegi yovetsikaigira terira onkametite. ²³Ikantaigakenatari: ‘Povetsikaigakenara notasorintsiegite tentaigananenerira. Yogari Moiseshi gaigaatanarira Ejipitoku teranika nogoige tyarika itsatake neroty tera iripokae.’ ²⁴Naro nokantaigiri: ‘Tyanirika shintankicha kori irapatoigakerira iramaigakenarira.’ Iriroegi yamaigakena impo naro novuokavokitakeri oga ikenake ipeganaka ityomiani toro.

²⁵Impo yogari Moiseshi yogavagetanaketyo kavako ineakera okañotakara maika yovetsikagisevageigakera maganiro terira onkametite, aikiro tera tyara inkantumai-geri Aaron. Aikiro yogotake inkemakoigakeririka kisashiigakaririra ontirorokari isamatsanaigakeri inkaavintsanaigakerira, ²⁶neroty iatantakarira yaratinakera okaratakera ivankoegi ikanti:

—¿Tyani kogankitsi inkematsatasa-noigakerira Tasorintsi? Tyanirika kogankitsi iripokaigake aka naroku intentaigakenara.

Impo inti aigankitsi maganiro iyashikii-ganakerira Irevi. ²⁷Impo irirori ikantaigiri:

—Ikantake Tasorintsisanorira Itinkamiegi iseraereegi ikanti: ‘Pagaiganakera paniropage pisavuriegeite pampagoigakera impo piaigakera ivankoegiku pitovaireegi pogaigakerira. Irirorika pirenti intirika piamigote intirika pashini piitane pogaigakerityo.’

²⁸Impo iriroegi itsatagaigakero magatiro ikantaigakeririra Moiseshi yogagarantaigakeri itovaire ikamaigake 3000. ²⁹Impo ikantaigiri Moiseshi:

—Maika viroegi inkavintsajaigake Tasorintsi, ineagakempitari arisano pikogaigake pintsatagaigakerora ikantaigakempirira, pogaigakeritari pitomi intiri pirenti.

³⁰Impo okutagitetanakera ikantaigiri maganiro:

—Viroegi pairotyo povetsikaigake terira onkametite, kantankicha naro noatake noniakera Tasorintsi noniaventaigakempira ariorika irogavisaakoigaempi.

³¹Impo iatake ikantakerira Tasorintsi:

—Yogaegi notovaireegi iseraereegi pairo yovetsikaigake terira onkametite, yagaigaketari kori yovetsikaigakera itasorintsiegite. ³²Maikari maika atsi pimagisantaerora yovetsikaigakerira gara pikisashiigari. Garika pikogi pimagisantakoigakerira narotyoko pinkashitakempa pisaankaerora novairo pitsirinkakotakenara pisankevantiteku.

³³Kantankicha irirori ikantiri:

—Intaganityo nonkisashitakempa tyanirika terira inkematsatena nosaankakotakerira. ³⁴Maikari maika piate

pamaiganakerira anta nokantakempira piaigakera. Naro nontigankakeri nosaankariite intentaiganakempira, kantankicha impogini nompokakite nonkisashiigakitemparira terira inkematsaigena ovashi nonkenkiagaigakeri yovetsikaigakerira maika.

³⁵Impogini ovashi yatsipereakagavageigakari posante, ikisaviigakeritari ineagakerira ikanagaventaigakerira ityomiani toro yovetsikaigakeneririra Aaron aikiro itagaigakenerira piratsipage.

33 ¹¹Kantankicha inti itentaka Moiseshi iniavakagaigara kañomatata irironirikatyo iniake iamigote. ...

¹⁸Impo irirori ikantiri:

—Nokogake noneakempira pishimpokirerenkakera.

¹⁹⁻²¹Ikantiri:

—Gara pagavei pineenara. Antari pineakenarika onti pinkamake, gatanika itimumati gaveankitsinerira ineakenara. Kantankicha kamani pimpokake aka paratinkakera imperitaku impo naro navisanake nonkamantakempira tyara nopaita, narotari NANTI. ^fTyanirika nonintake naro nontsarogakagakempirira nontsarogakagakemparityo. Aikiro tyanirika nonintake nonkavintsavagetakerira nonkavintsavagetakerityo.

²²Impo antari navisanakera nogiagana-kempi otsiraakera imperita nontikakotantanakempiro nako navisanakera.

²³Impo namereakotaempi pineakenara notishitaku. Ogari novoro garatyoko pineimatiro.

34 ¹¹Impo ikantiri aikiro: —Povetsikaera pashini piteti mapu pinkañotagakempirara oketyorira novetsikavetaka naro pitimporokakerira. Impo naro nontsirinkaero magatiro

f 33.19-21 Antari ikantakerira Moiseshi “narotari NANTI” onti iniakotakero ivairo otsirinkakotunkanirira Ek. 3.14.

notsirinkavetakarira okyara. ²Povetsikakempara pimpokamanakera kamani aka otishiku Sunai ochovaankakera, ariotari nonakeri naro. ³Garatyo tyani pitentumata, aikiro garatyo tyani kenumatatsi kara otishiku. Aikiro garatyo yaiñonitumaiga ovisha intiri toro isekataigakempara kara okaragetakera.

⁴Impo yogari Moiseshi ikaratake mapu yovetsikake pikotateti ikañotagakaro oketyorira yovetsikake Tasorintsi. Impo okutagitetanakera iatamanake otishiku yamagetanakerora itsatagakerora ikantakeririra Tasorintsi. ⁵Impo yogari Tasorintsi yaguitapaake menkoriku yaratinkimotapaakerira ikamantakerira tyara ipaita ikanti:

—Naro nopaita NANTI.

⁶Impo yavisana ke ikenagutanakerira ikanti:

—iNantitari NANTI! Nanti Tasorintsi sanorira. Pairo notsarogakagantavageta, aikiro nokavintaasantavageti. Tera nonkatimaigeri nonkisashiigemparira vetsikaigatsirira terira onkametite, onti samani natsipereakoigakari. Pairo notasanotanta, aikiro tera namatagumtempa omirinkatyo notsatagi noniane. ⁷Notsarogakagaigari tovaini matsigenkaegi tera nonkisaviigeri yovetsikagisevageigira terira onkametite onti nomagisantakero, kantankicha yogaegi terira inkogaige inkematsaigakenara garatyo nogavisaakoigiri, ontityo nonkisashiigakempari, nomaiganakerityo itomiegi, ivisariegitte intiri iyashikiiganakerira.

⁸Yogari Moiseshi irorotyoko ikemakerira iniakera igenanekyatyotigeroaventanakari yogivosetanakatyo kipatsiku.

²⁸Impo inake kara 40 kutagiteri itentakirira Tasorintsi. Tera isekatumtempa, aikiro tera iroviikumtempa. Impo itsirinkagetakero magatiro ikantakeririra Tasorintsi intsatagaigakerora iseraereegi. Impo yogari Tasorintsi onti itsirinkake

ikantagetirira natsirira 10. Onti itsirinkantakaro mapu yovetsikakerira Moiseshi.

²⁹Impogini ipokai Moiseshi yamagetakero pitetiro mapu itsirinkantakarira Tasorintsi. Antari ipokaira shimpokirerenkamataketyo kara ivoro kantamatake porererere, ontitari iniakerira Tasorintsi, kantankicha irirori tera irogote ikañotakara maika.

³⁰Yogari Aaron intiegiri maganiro iseraereegi ikamaguigavetavakari ineaigutarityo shimpokirerenkamataketyo ivoroku ovashi ipinkaigakeri iraiñoniigakemparira. ³¹Kantankicha irirori ikaemai-gakerityo ovashi iatake Aaron itentaiganakarira maganiro itinkamipage iseraereegi yaiñoniiganakarira. Impo irirori iniaigakeri. ³²Impo imaiganaka maganiro iseraereegi yaiñoniiganakarira ovashi ikamantageigakeri magatiro ikantagetakeririra Tasorintsi anta otishiku Sunai. ³³Impo yagatakera iniaigakerira itikakotaka ivoroku pañoirontsiku.

³⁴Antari iatapinitira inakera Tasorintsi iriniakerira ario inoshikakero, impo ipokaira ikamantageigakeri maganiro ikantakeririra Tasorintsi intsatagaigakerora. ³⁵Maganerotyo ineaigakeri shimpokirerenkamataketyo ivoroku. Impo yagatanaira iniaigakerira itikakotanaa pañoirontsiku. Antari iataira iniairira Tasorintsi ario pinkante inoshikairo.

39 ⁴²Impogini yogaegiri iseraereegi itsatagaigakero magatiro ikañotagasanoigakaro ikantagetakeririra Tasorintsi Moiseshi. ⁴³Antari ineagetakerora irirori ikañotagasanoigakarora ikantaigakeririra iniaventaigakeri inkavintsajagakerira Tasorintsi.

**Apamankanakarora menkori
ivanko Tasorintsi**

40 ¹Impogini yogari Tasorintsi ikantiri Moiseshi:

²“Pogaratinkakagantagetakerora novanko povetsikakagantagetakerora

kutagiteriku 1 kashiriku 1. ³Pogakerora nogajonakite tsompogi pintsatamagotakerora kamisa tikakotakeronerira.”

Impo ikamantakeri tyara inkantagetakero magatiro nagetankitsinerira tsompogi ivankoku. Impogini irirori yagatagetakero magatiro.

³⁴Impogini ogari menkori apamankanako ivanko Tasorintsi ogaty okenake okantanake tsompogi porererere, ipokaketari Tasorintsi kara ivankoku. ³⁵Yogari Moieshi tera

iragavee inkiakera tsompogi, otikakotakerotari menkori, aikiro kantamaketari porererere. ³⁶⁻³⁸Impo kantaka onakera menkori kara ivankoku Tasorintsi. Antari ikogakera Tasorintsi irimaiganaerora aikiro iseraereegi iriaiganaera ogaenokanaa menkori amereanaa ivankoku ariokya oivatanai ovashi ipampiaiganairora. Antari terika amereempa teratyo iriaige, kantakatyo inagakera kara. Ogari sagiteniku onti opoamatanai. Ineaigakero maganiro iseraereegi. Kantaka okañotakara maika ovashi yogonkeiganakara Kanaanku.